



**Sud Bosne i Hercegovine**  
**Суд Босне и Херцеговине**

---

**Broj: S1 3 Iž 043258 22 Iž**  
**Sarajevo, 21.07.2022. godine**

Sud Bosne i Hercegovine u Sarajevu, u apelacionom vijeću sastavljenom od sudija Srete Crnjaka predsjednika vijeća, Vesna Trifunović i Mirka Božovića članova vijeća, odlučujući o žalbi političke stranke Hrvatska stranka prava dr. Ante Starčević sa sjedištem u Širokom brijegu Donji Crnač bb koju zastupa Miljan Nakić predsjednik stranke, izjavljenoj protiv odluke Centralne izborne komisije Bosne i Hercegovine broj: 05-01-07-6-1201/21 od 16.06.2022. godine, zbog kršenja Zakona o finansiranju političkih stranaka, u nejavnoj sjednici održanoj dana 21.07.2022. godine, donio je

**R J E Š E N J E**

Žalba se odbija.

**O b r a z l o ž e n j e**

Odlukom Centralne izborne komisije Bosne i Hercegovine broj i datum navedeni u uvodu, utvrđeno je da je politička stranka Hrvatska stranka prava dr. Ante Starčević odgovorna što u 2019.godini :

- a) nije sačinila Plan utroška sredstava za 2019. godinu na način da se obezbjedi potpuna transparentnost planiranog trošenja sredstava, kao i njihova uporedba sa ostvarenim troškovima, finasijska sredstva u iznosu od 3.808,00 KM utrošila mimo utvrđenog plana utroška sredstava za 2019. godinu, čime je prekršila odredbe člana 4 stav 1 Zakona o finansiranju političkih stranaka i
- b) nije vodila poslovne knjige na način koji je utvrđen zakonom i drugim propisima u skladu sa zakonom, nije uspostavila evidencije o blagajničkomposlovanju, приходима i rashodima stranke, čime je prekršila odredbe člana 11 stav 1 i člana 12 stav 1 Zakona o finansiranju političkih stranaka,

pa joj je na osnovu člana 15 stav 2 i primjenom člana 19 stav 1 tačka a) i f) Zakona o finansiranju političkih strankama izrečena :

- 1) za povredu iz stava 1. tačke a) novčana kazna u iznosu od 1.000,00 KM,
- 2) za povredu iz stava 1. tačke b) novčana kazna u iznosu od 1.000,00 KM, odnosno jedinstvena novčana kazna u iznosu od 2.000,00 KM.

Protiv ove odluke politička stranka Hrvatska stranka prava dr. Ante Starčević blagovremeno je podnijela žalbu navodeći da su svjesni određenih nedostataka u finansijskom izvještaju, te da zbog finansijskih problema mole da se umanjí iznos novčane kazne.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu jer je ožalbena odluka donesena na pravilna i potpun način u skladu sa zakonom i podzakonskim aktima.

Žalba nije osnovana.

Prema stanju u spisu predmeta, Centralna izborna komisija BiH je razmatrajući Preliminarni izvještaj službe za reviziju o pregledu godišnjeg finasijskog izvještaja za 2019. godinu političke stranke Hrvatska stranka prava dr. Ante Starčević broj 03-07-6-276/20 iz februara 2021. godine, utvrdila da je politička stranka prekršila odredbe Zakona o finasiranju političkih stranaka. Izvještaj je dostavljen političkoj stranci na izjašnjenje, te nakon što je izostalo izjašnjenje, Služba za reviziju, sačinila je Konačni izvještaj o pregledu finasijskog izvještaja za 2019. godinu političke stranke Hrvatska stranka prava dr. Ante Starčević.

Navedeno je bilo osnov da Centralna izborna komisija BiH, po službenoj dužnosti, Zaključkom broj 05-1-07-6-1201/21 od 30.12.2021.godine, pokrene postupak utvrđivanja odgovornosti protiv žalitelja, zbog osnovane sumnje da je ova politička stranka u 2019.godini kršila odredbe Zakona o finasiranju političkih stranaka.

U postupku utvrđivanja odgovornosti, Centralna izborna komisija BiH je nakon uvida u Konačni izvještaj utvrdila da politička stranka Hrvatska stranka prava dr. Ante Starčević nije sačinila Plan utroška sredstava za 2019. godinu i da finasijska sredstva u iznosu od 3.808,00 KM utrošila mimo finasijskog plana odnosno Programa utroška sredstava za 2019. godinu, te da nije vodila poslovne knjige na način utvrđen zakonom i drugim propisima i nije uspostavila evidencije o blagajničkom poslovanju, prihodima i rashodima stranke.

Politička partija čija je odgovornost utvrđena ožalbenim rješenjem, odluku pobija samo u pogledu visine izrečene novnačne kazne. Stoga je predmet ocjene pravilnosti i zakonitosti ožalbenog rješenja pred Apelacionim vijećem Suda Bosne i Hercegovine, bio samo osporavani dio odluke.

U konkentom slučaju politička partija Hrvatska stranka prava dr. Ante Starčević počinila je povredu odredbi člana 4 stav 1, člana 11 stav 1 i člana 12 stav 1 Zakona o finasiranju političkih partija (Sl. glasnik 95/12 sa izmjenama). Za svaku navedenu povredu citirani zakon u člana 19 stav 1 tačka a) i f) propisuju novčane kazne u rasponu od 500,00 KM do 10.000,00 KM. Izricanjem novčanih kazni od po 1.000,00 KM, Centralna izborna komisija BiH je političkoj partiji Hrvatska stranka prava dr. Ante Starčević, izrekla novčanu kaznu u rasponu koji zakon propisuje.

Iz obrazloženja ožalbenog rješenja proizilazi da je prilikom određivanja visine novčane kazne cijenjeno da je u vrijeme donošenja ožalbenog rješenja politička partija bila kažnjena dva puta za kršenje Zakona o finasiranju političkih partija.

Nadalje, uzeta je u obzir težina prekršaja za koji je politička partija proglašena odgovornom, kao i finasijsko stanje političke partije prema kome je u godini 2019. ostvarila prihod od 13.020,00 KM.

Na osnovu iznesnog Apelaciono vijeće je zaključilo da je Centralna izborna komisija BiH prilikom određivanja visine novčane kazne cijenila sve relevantne podake od značaja za utvrđenje visine sankcije koja će biti adekvatna počinjenoj povredi. Kada se ima u vidu da je izrečena novčana kazna u iznosu koji je približan zakonskom minimumu, Apelaciono vijeće je zaključilo da neargumentovani navodi žalbe, odluku neosnovano pobijaju.

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

**PREDSJEDNIK VIJEĆA  
S U D I J A**

**Sreto Crnjak**